

崔舍人玉堂類藁 附錄 三



藁類堂玉人舍崔

錄 附

(三)

著 詩 敦 崔

王雲五主編
叢書集成初編
崔舍人玉堂類纂
附錄三

中華民國二十五年十二月初版

著者 崔敦詩

發行人 王雲五
上海河南路

印刷所 商務印書館
上海河南路

發行所 商務印書館
上海及各埠

翁

崔舍人玉堂燕臺詩卷之五

口宣

金國賀會慶聖節使人回程盱眙軍賜御筵口宣

卿等來修聘禮。回次淮津。念將越於邊疆。俾少休於候館。特馳使騎。就啓賓筵。

遇冬至節賜使副節絹口宣

風威載肅。水澤將堅。深懷使介之勤。重涉川塗之遠。爰推厚錫。庶表隆私。

賜三節人從冬至節絹口宣

汝等使事言旋。歸塗尙遠。適履隆寒之序。□□卒歲之求。爰有分頒。俾同安吉。

鎮江府賜御筵口宣

卿等整駕歸程。經塗會府。將濟江而于邁。俾就館以少留。馳諭至懷。卽陳高會。

使人到闕十月二十七日賜內中酒果口宣

留連使節。燕息賓郵。爰頒多旨之醪。仍侑甘新之實。是將厚意。並出內庭。

玉津園射弓賜酒果口宣

冬陽和豫。禁苑閑深。方觀審固之能。爰錫甘芳之品。庶資宴樂。宜遂從容。

回程赤岸賜御筵口宣

卿等聘儀成禮。歸馭首塗。方出次於近郊。俾就陳於高會。是昭眷遇。庸慰勤勞。

玉津園射弓賜弓箭例物口宣

卿等使事少間。賓儀載舉。知和容之有度。諒命中之無虛。爰致分頒。宜留衍樂。

上壽畢歸驛賜御筵口宣

卿等入筵壽班。退休賓驛。觀修容而可度。知率禮以無違。式厚眷懷。卽頒燕衍。

十月二十一日賜內中酒果口宣

使介之勤。過休外館。酒肴之錫。分出內庭。庶表眷私。是昭寵異。

朝辭訖歸驛賜酒果口宣

卿等已畢邦儀。遂辭殿陛。方歸休於賓舍。當漸理於歸裝。爰示燕慈。用昭眷禮。

在驛賜牲餼口宣

卿等並展使華。夙將慶問。過卽賓郵之適。就頒禮餼之豐。是出眷懷。宜資燕喜。

賜宰執已下喜雪御筵口宣

氣入祁寒。雪呈瑞應。驗玉燭之無爽。慶金穰之有期。爰厚惠慈。宜同燕樂。

金國賀會慶節使人到闕賜被褥鈔鑼等口宣

卿等遠馳使傳。入憩賓郵。既休跋履之勤。宜便寢興之用。爰加寵錫。庶示恩懷。賜射弓例物口宣。

卿等聘儀成禮。使事多勞。宜從禁苑之遊。用洽賓歡之適。爰推寵賚。式示眷懷。十月二十七日。賜內中酒果口宣。

使介聯華。方休外館。甘芳推錫。咸出內庭。爰諭口懷。庶章優遇。

密賜大銀器口宣

卿等祇達慶書。肅成聘禮。出眷懷之優渥。錫器用之光華。仍諭溫言。庶昭殊遇。

朝辭訖歸驛賜酒果口宣

卿等聘禮有成。使儀云復。已展辭於殿陛。方歸息於都郵。爰致甘芳。庶資宴樂。

回程鎮江府賜御筵口宣

冬律向寒。使車遄邁。諒經途於會府。當弭節於賓郵。爰示恩懷。卽勝燕禮。

在驛賜生餼口宣

使華持禮。邦好成儀。重懷次舍之須。特厚餼牽之品。宜承恩錫。尙體誠懷。

賜射弓酒果口宣

良弓勁矢。維以觀能。嘉實芳醪。庶其將意。宜服惠慈之寵。益施審固之長。

賜步軍司滿散會慶聖節道場乳香口宣

卿職司禁旅。時際誕辰。卽梵宇以輸誠。率歡心而介壽。爰加頒錫。用助精虔。

賜馬軍司滿散道場乳香口宣

卿典司驍騎。拱衛嚴宸。欣達載震之期。虔祝無疆之壽。專馳近侍。俾錫名香。

金國賀正旦使人赴闕鎮江府賜御筵口宣

卿等遠將慶禮。祇會元正。適取道於江城。聊弭旌於賓館。專馳近侍。卽啓華筵。

鎮江府賜茶藥口宣

卿等來會元春。行經近府。頒以靈芽之貴。副之珍劑之良。用慰勤勞。式昭眷遇。

回程平江府賜御筵口宣

使節言旋。歸途尙邈。念當經於近府。俾就啓於初筵。式示恩光。宜流燕樂。

玉津園射弓賜酒果口宣

卿等使事有間。禁園肯樂。錫以上尊之旨。侑之嘉實之芳。庶洽歡虞。宜承眷遇。

十二月三十日賜內中酒果口宣

卿等使華假息。賓館從容。適當歲律之除。爰示恩光之異。凡茲多品。出自內庭。

回程賜龍鳳茶并金鍍銀合口宣

建溪方貢。內府珍藏。爰嘉使傳之華。聊備歸裝之用。式將眷遇。尙體誠懷。

朝辭訖歸驛。賜御筵口宣

卿等並飭使儀。肅成邦禮。旣入辭於殿陛。方出憩於賓郵。就啓華筵。式昭厚遇。

回程赤岸。賜酒果口宣

卿等馳輶成禮。濡轡遵途。知漸遠於都門。聊少留於郊館。式加頒賚。用示眷私。

盱眙軍。賜御筵口宣

卿等言旋使傳。已屆邊疆。重懷跋履之勞。爰示惠慈之眷。宜留衍樂。庶遂從容。

上壽畢。歸驛。賜酒果口宣

卿等肅將使命。祇會春朝。旣進畢於壽儀。方退休於賓驛。爰推賜品。用表眷懷。

回程赤岸。賜御筵口宣

卿等聘禮有成。使輶云復。方弭裝於近館。爰示惠於初筵。尙體恩私。宜留燕樂。

賜金國使副春幡勝等口宣

氣轉洪鈞。祥開蒼陸。深念歲華之變。適當使節之留。爰舉時儀。俾綏壽福。

賜送伴使副春幡勝等口宣

三陽布澤。萬彙回春。興言文武之臣。適有驅馳之役。並推賜式。庸示恩懷。

賜金國三節人從春幡勝口宣

冬律載更。春華方動。爰均頒於節物。庶昭示於恩光。宜體眷存。各忘勞役。

趙雄辭免轉官不允批答口宣

卿總率諸儒。刪裁大典。閱簡編之告備。仰謨烈之增光。已錫茂恩。豈容固遜。

錢良臣辭免轉官不允斷來章批答口宣

書成良史。禮講上儀。重嘉使領之勞。爰厚恩榮之典。宜收沖節。卽服優章。

周必大辭免轉官不允斷章批答口宣

書成史策。賞逮儒勞。已孚成命之行。尙閱沖章之至。宜祇眷遇。卽服恩光。

樞密使王淮辭免轉官不允批答口宣

史書來上。賞典時行。肆疇論譔之勞。爰厚褒榮之禮。卽宜祇服。毋重謙陳。

賜王淮再上表辭免轉官不允斷章批答口宣

賞典旣行。民言維允。方趣頒於明制。奚確避於□□。宜服寵光。尙圖報禮。

賜王淮告口宣

啓封全國。進位崇階。雖優答於勤勞。實顯加於體貌。當祇隆遇。卽服榮章。

撫問賀金國正旦使副葉宏等到闕并傳宣賜銀合茶藥口宣

卿等將聘出疆。振衣還闕。深念馳驅之遠。爰加撫勞之溫。仍有恩頒。併昭眷遇。撫問新知。建康府范成。大到闕。并賜銀合茶藥口宣。

卿廟堂宿望。藩輔殊庸。當趨行闕之朝。遂卽留都之鎮。專馳近侍。俾諭深懷。

賜進士聞喜宴口宣

傳臚殿陛。合射宸庭。旣具洽於龍光。宜胥同於燕樂。尙承恩遇。各勉忠圖。

史浩辭免轉官不允批答口宣

篇徹經筵。恩施儒彥。方隆耆德之遇。宜厚寵章之加。固出至懷。奚勞重請。

賜史浩除少師告口宣

卿歷殫誠請。願卽里居。旣勉徇於高情。宜優加於茂典。祇承恩命。益介壽祺。

史浩辭免特授少師不允批答口宣

朕優崇元老。寵賁歸途。旣聳暢於高風。益允符於輿論。尙堅素守。殊拂深懷。

史浩斷來章批答口宣

卿潛藩舊德。合路耆臣。旣莫遂於眷留。爰有加於恩遇。已孚明命。宜略謙章。

賜趙雄告口宣

卿屢貢需章。確辭丕務。已勉從於雅志。仍優畀於便藩。宜服茂恩。更昭顯績。

賜王淮告口宣

朕參稽公論。登用眞儒。已誕告於廷紳。方聳觀於賢業。宜承休命。益邁遠猶。

金國賀會慶節使人回程盱眙軍賜御筵口宣

卿等並持使節。胥會誕辰。方回次於邊疆。爰卽攷於宴席。宜承眷遇。各慰賢勞。

平江府賜御筵口宣

卿等抗旛成禮。回轡遵塗。念多跋履之勤。宜厚惠慈之寵。專馳近侍。深諭至懷。

鎮江府賜御筵口宣

卿等修禮告成。受書端邁。適弭旛於近府。行整棹於長江。爰錫初筵。是昭優遇。

赤岸賜御筵口宣

卿等並驅周道。甫出脩門。念行涉於長途。宜優加於榮遇。卽頒宴席。宜體眷懷。

赤岸賜酒果口宣

卿等濡轡登途。弭旛就館。方少休於徒御。爰併錫於旨芳。庶洽燕私。各忘疲勤。

朝辭訖歸驛賜御筵口宣

卿等使事已成。禮儀無爽。旣展辭於殿陛。方歸憩於都郵。爰厚惠慈。俾同燕樂。

朝辭訖歸驛賜酒果口宣

卿等受書以退。竣事而旋。諒多陟降之勞。爰厚旨嘉之品。宜祇寵錫。各體眷懷。

玉津園射弓賜弓箭例物口宣

卿等使事有間。射儀克講。爰厚旌館之寵。仍加適用之良。宜體眷私。尙留款樂。

賜被褥鋤鑪口宣

卿等奉將使信。修講慶儀。適休跋履之勞。宜便寢興之用。諒承賜品。當識眷懷。

密賜大銀器口宣

卿等使範聿修。邦盟胥洽。爰輟中金之器。俾將密賚之誠。實出深懷。固爲優遇。

回程賜龍鳳茶口宣

卿等使事勤勞。歸途脩遠。爰有建溪之品。實推御府之奇。特俾分頒。卽宜祇受。

賜三節人從冬至節絹口宣

一陽潛復。萬彙交通。興言行役之長。當動歲華之感。特均頒賚。並慰勤勞。

賜使副冬至節絹口宣

節紀陽正。氣回地管。適履風霜之變。諒懷衣褐之求。爰選善縑。俾將至意。

賜步軍司滿散會慶節道場乳香口宣

卿等職專師旅。義重君親。適當載夙之辰。共祝無疆之福。特加錫予。用助精虔。

撫問金國賀正旦使人赴闕肝胎軍賜御筵口宣

卿等並馳使傳已越封疆爰敷溫厚之辭仍錫惠慈之燕宜祇眷意各釋賢勞

平江府賜御筵口宣

卿等來慶新正行經近府爰念使華之遠重懷征役之長式厚眷慈俾紆勤勩

鎮江府賜銀合茶藥口宣

卿等持禮正朝經途會府爰錫靈芽之貴仍頒上劑之良用輔至和庶昭殊遇

鎮江府賜御筵口宣

卿等已濟江流稍休賓館爰專馳於近侍俾就啓於初筵庶表眷懷用紓行役

赤岸賜御筵口宣

卿等載驅使傳密近行都宜少駐於賓郵俾卽頒於燕席各承眷禮咸釋賢勞

赤岸賜酒果口宣

屬聞使節行次郊圻卽候館以少留瞻行都而甫邇宜加恩賚式表眷懷

入賀畢歸驛賜御筵口宣

卿等入趨文陛修慶華正方歸憩於都郵俾卽頒於燕具庸昭眷遇式慰勤勞

玉津園射弓賜例物口宣

使華暇日。禁苑勝遊。方觀中的之長。宜有旌能之具。特加頒賚。式示寵嘉。

玉津園賜射弓酒果口宣

卿等並驅濡轡。同樂芳園。屬施弓矢之能。爰往豆觴之品。宜祇眷遇。庶洽歡虞。

玉津園賜御筵口宣

張弓挾矢。旣展令儀。鼓瑟吸笙。宜陳高會。庶留燕樂。各遂從容。

賜居廣批答口宣

褒崇宗老。敷錫恩章。已具協於公言。奚尙堅於謙守。茲加申諭。宜卽祇承。

賜士輅再上表辭免不允仍斷來章批答口宣

敦敘宗盟。優崇族老。爰餽釐而布惠。乃亶號以揚廷。衆聽已孚。謙辭何益。

賜居廣再上表辭免不允仍斷來章批答口宣

席慶皇家。蜚華天路。茲衍博臨之況。乃優褒敘之恩。命已維行。理無可避。

撫問金國賀正旦使人赴闕盱眙軍賜御筵口宣

遠將邦禮。甫越邊疆。諒備罄於勤勞。爰優加於慰撫。仍開惠燕。併示眷懷。

鎮江府賜御筵口宣

揚舲江道。弭節賓郵。良多跋涉之勞。式厚惠慈之禮。聊紓行役。庶表恩私。

士輅特授少師加食邑賜告口宣

朕齋精飭躬廣大建祀既沛熙成之澤宜優惇敘之恩茂錫寵光益昭眷禮

居廣特授少傅加食邑賜告口宣

朕肇稱新禮宗祀明堂有衍欽柴之休無踰常棣之愛茲頒顯命是出殊私

士輅上表再辭免除少師恩命不允批答口宣

修祠世室徹胙堂筵爰加厚於親盟乃優推於邦典茲惟至意奚可固辭

明堂大禮畢紫宸殿受賀內侍宣答管軍詞

祇率彝章肇修嘉饗資爾中權之彥罄茲周衛之勞神心顧懷福貺昭答

紫宸殿受賀閣門官宣答樞密詞

稽古彌文觀時亨會咸來四海之助迄就九筵之儀實賴交修敢居飽饗

紫宸殿受賀樞密宣答皇太子詞

祇荷洪休肅嚴大報既告虔於清廟遂展祀於合宮四方具來諸福畢至

麗正門肆赦閣門官宣答皇太子詞

躬祠世室還御端門沛恩宥於中天廣福祥於下國

崔舍人玉堂類藁卷第十六

口宣

勅書附

金國賀正旦使人赴闕鎮江府賜茶藥口宣

使傳飛華江城經道興念川途之勤卽頒茗劑之良庸表眷私庶資和膏
赤岸賜御筵口宣

將命修歡聯車遵道方少留於郊館當卽入於都門式厚眷懷就陳燕會

回程賜龍鳳茶并金鍍銀合口宣

涓辰遵道留館治行因頒異茗之良庶備歸裝之用是爲嘉錫宜體深懷

使人到闕賜被褥鈔鑼等口宣

遠持使命初抵都郵豈無應用之須爰有分頒之寵宜承優賚式體隆懷

入賀畢歸驛賜酒果口宣

進朝宸陛退息賓郵第嘉實以分甘出上尊而致賜庶資燕喜用慰勤勞

入賀畢歸驛賜御筵口宣

遠將慶禮同預壽班旣訖事於殿庭方歸休於館舍爰開惠燕庶洽恩私

玉津園賜射弓弓箭例物口宣

使華來聘。暇日出遊。聞射藝之有儀。知賓歡之正洽。爰加頒賚。庶表眷懷。

玉津園射弓賜御筵口宣

春陽方動。使事少閒。適彼禁園。游於射藝。爰啓惠慈之宴。庶昭審固之能。

朝辭訖歸驛賜御筵口宣

已畢邦儀。遂辭宸陛。嘉進趨之有度。念陟降之良勞。爰卽都郵。俾陳燕會。

金國使副賜春幡勝等口宣

寒回□陸。春入東郊。適尙駐於使旃。俾卽頒於時物。宜承嘉錫。茂介繁祺。

賜館伴使副春幡勝等口宣

氣旋蒼陸。仗轉青旗。適更時序之新。重起賢勞之念。爰推寵錫。俾對熙辰。

賜三節人從春幡勝口宣

和風入律。青令乘規。尙勤使事之留。適閱物華之變。並推嘉錫。庸慰遠懷。

密賜大銀器口宣

使節聯華。聘儀成禮。分此中金之器。出於內府之藏。式厚恩盼。庸昭眷遇。

撫問賀金國正旦使副陳峴等到闕并賜銀合茶藥口宣

聯轡出疆。弭旃還闕。載念川塗之勤。式頒茗劑之良。仍諭溫言。庶昭至意。

御藥院申乞撰進呈三祖下第六世仙源類譜仁宗皇帝十年玉牒所有合用提舉官禮儀使已下宜答詞

慶系蕃昌。聖謨宏遠。爰輯成於大典。茲並告於成書。既遂覽觀。卽嚴尊閑。

進呈仁宗皇帝十年玉牒哲宗皇帝一朝玉牒宜答提舉官禮儀使已下詞

書備兩朝。事光萬世。寫之琬琰。煥乎文章。既具閱於奏篇。當永嚴於尊閑。

賜趙丞相不允批答口宣

寶牒告成。皇猷增煥。式厚褒嘉之典。庸旌綜理之勤。宜服溫言。卽承休命。

賜參知政事錢良臣不允斷來章批答口宣

書成寶牒。事謹珍藏。興言使範之勞。加厚褒章之寵。已孚成命。宜止謙辭。

賜右丞相趙雄不允仍斷來章批答口宣

典策告成。臣民均慶。乃眷提綱之績。可稽詔賞之恩。開諭已明。謙辭毋至。

賜賀金國生辰使副傅淇王公弼到闕撫問并賜銀合茶藥口宣

抗旌修聘。濡轡還朝。良多跋履之勤。重有光華之遠。爰推嘉錫。仍致溫言。

賜殿前司滿散天申聖節道場乳香口宣

職重典兵。誠深愛上。屬紀發祥之旦。具脩介壽之儀。爰致名香。庶資善祝。

賜步軍司滿散天申聖節道場乳香口宣

總提勁旅。典護嚴宸。欣逢彌月之期。深祝後天之筭。爰頒名馥。庶助精誠。

賜樞密院官滿散天申聖節道場乳香口宣

位高宥府。時際誕辰。輯仙梵之勝緣。介壽昌之備福。爰頒名馥。俾達丹誠。

賜樞密院官齋筵酒果口宣

赤符開運。華渚標辰。眷言西府之臣。同効南山之祝。爰推嘉錫。往侑華筵。

周必大上表再辭免除參知政事不允仍斷來章批答口宣

朕選求人望。參翊政機。當成命之方行。已僉言之維允。亟恢賢業。遂略謙章。

謝廓然上表再辭免除端明殿學士簽書樞密院事不允仍斷來章批答口宣

登用宏才。參陪宥府。已亶縉紳之聽。方須帷幄之謀。宜止常謙。卽承亨遇。

賜陳俊卿告口宣

褒表民庸。登崇孤位。已布宣於明命。咸允愜於輿情。茲錫恩綸。宜承眷禮。

金國賀會慶節使人赴闕平江府賜御筵口宣

祇輯歡盟。肅將慶問。念載驅於周道。知已屆於吳門。爰錫華筵。用昭優遇。

盱眙軍賜御筵口宣

歡盟交聘。虜使聯華。聞甫越於邊疆。諒少休於候館。亟馳內侍。卽啓初筵。

赤岸賜御筵口宣

眷言使傳。密邇都門。諒多行邁之勤。宜適燕胥之樂。專馳近侍。申諭深懷。

赤岸賜酒果口宣

銜命鼎來。涓辰入見。已次邦郊之近。重懷使傳之勞。爰致甘滋。俾留衍樂。

上壽畢歸驛賜御筵口宣

展慶闕庭。歸休館舍。見修儀之有度。嘉將命之無違。式示惠慈。用昭眷遇。

賜皇子魏王生日詔

夏籥啓和。允符令節。天支衍慶。誕育賢王。爰推賜式之優。往積壽齡之永。

賜右丞相曾懷生日詔

朱衡御令。式紀嘉辰。喬嶽儲休。是生碩輔。往侑燕私之喜。特將慶賜之儀。

賜鄭藻生日詔

氣協薰弦。慶鍾懿範。紀嘉祥於初度。將厚意於多儀。介爾壽祺。昭予眷禮。

賜皇叔祖少保昭化軍節度使判大宗正事嗣濮王士輅生日詔

親賢並茂。爵齒兼崇。屬當流火之辰。適紀垂弧之旦。爰將蕃錫。庶續遐齡。賜皇兄少保岳陽軍節度使充萬壽觀使永陽郡王居廣生日詔。氣中商籥。爰及嘉辰。慶衍宗盟。是生賢屬。往助私庭之喜。特推內府之儀。

賜皇太子生日詔

茂德聰文。純誠淵塞。爰紀金行之序。是鍾玉裕之資。式厚賜儀。載綏福履。賜昭慶軍節度使簽書樞密院事楊倓生日詔。

氣肅清商。適兆祥於勳閥。時生俊德。方陪議於幾庭。有腆予頒。往綏爾福。賜簽書樞密院事李彥穎生日詔。

寒籥司辰。祥弧紀旦。載育醇明之彥。方陪宥密之廷。爰致賜儀。俾綏壽福。賜簽書樞密院事錢良臣生日詔。

序協中冬。時生賢佐。往侑私庭之慶。特推賜式之優。俾介壽祺。亦將眷禮。

賜皇子魏王愷生日詔

席慶仙源。憑暉霄極。適清和之嘉序。正誕育之良辰。爰往賜儀。俾綏壽祉。賜少保寧武軍節度使充醴泉觀使曾覲生日詔。

月協仲商。天澄西灝。眷我耆明之彥。紀茲誕育之辰。爰將寵頒。俾侑燕喜。

賜皇兄少保岳陽軍節度使充萬壽觀使永陽郡王居廣生日詔
素商應律。灝氣澄空。維予宗屏之賢。肇此門弧之旦。爰推賜式。俾介壽祺。
賜皇太子生日詔

天祐熙朝。時生元嗣。茂育溫文之德。永毗久大之基。式厚賜儀。俾綏壽福。
賜少傅保寧軍節度使充醴泉觀使兼侍讀史浩生日詔

初潛舊學。當代元臣。適商律之正清。知誕期之載至。爰將頒賚。俾介壽康。
賜保信軍節度使開府儀同三司充萬壽觀使鄭藻生日詔

月旅炎方。慶鍾咸曉。爰有純明之彥。是當誕育之辰。式厚分頒。俾資燕喜。
賜右丞相趙雄生日詔

天祐皇家。時生碩輔。式紀門弧之旦。方隆鼎鉉之功。宜厚分頒。俾資燕樂。
賜參知政事周必大生日詔

金行澄爽。玉管流商。氣鍾河嶽之英。時作邦家之輔。爰推賜式。俾介壽祺。
賜皇叔祖少師昭化軍節度使充醴泉觀使嗣漢王士輅生日詔
國重親賢。時尊爵齒。慶旋臨於穀旦。喜倍集於宗盟。爰厚分頒。俾綏壽豈。
賜少保寧武軍節度使充醴泉觀使曾覲生日詔

玉管吹商。金行變爽。眷我初潛之舊。紀茲載誕之辰。爰有恩頒。是昭禮遇。

賜皇兄少傅岳陽軍節度使充萬壽觀使永陽王居廣生日詔

德憑天緒。望冠宗藩。屬當執矩之秋。適紀垂弧之旦。爰推賜式。俾介壽祺。

賜參知政事錢良臣生日詔

昂陸司辰。陽正建統。天佑明昌之運。時生開亮之賢。宜有恩頒。俾綏壽祉。

賜樞密使王淮生日詔

序當炎籥。慶集高門。爰加厚於眷懷。俾優推於寵錫。永綏壽祉。茂輯勳庸。

賜安南國王加恩制勅書

朕肅涓涼籥。祇祀合宮。方覃澤於敷天。爰興懷於遠服。參稽慶典。優錫褒章。答爾恭勤。昭于眷禮。宜堅侯度。茂對邦祺。

回賜安南國王李天祚進奉大禮綱勅書

朕祇循彝典。丕藏明禋。維時藩服之臣。遠効貢□□實。載嘉純節。具閱多儀。式厚寵光。用頒慶賚。

賜判寧國府皇子魏王愷金合夏藥勅書

時當長育。氣及炎蒸。眷懷賢王。越處外服。特厚匪頒之式。往綏調御之宜。

賜福建路安撫使史浩銀合夏藥勅書

位崇公輔。寄重价藩。適當炎燠之辰。宜有綏調之助。特盼良劑。用表隆私。

賜四川宣撫使鄭聞銀合夏藥勅書

暫輟政塗。往釐蜀部。爰念青天之道。適當朱夏之辰。特厚寵頒。用資珍噐。

賜浙東安撫使錢端禮銀合夏藥勅書

圖政舊臣。典藩崇望。適茲憚暑。嘉乃宣勞。特頒上藥之良。往助冲襟之輔。

賜湖南路安撫使劉珙銀合夏藥勅書

夙預政幾。久分戎翰。屬炎蒸之在候。念綏御之多勤。爰厚匪頒。庶資輔養。

賜湖北安撫使沈夏銀合夏藥勅書

夏序向中。暑威滋盛。迺眷機廷之舊。適宜藩閫之勞。特厚分頒。用資調衛。

賜主管侍衛馬軍司公事趙樽銀合夏藥勅書

眷爾忠誠。典吾親衛。屬炎威之蒸勃。亮戎務之勤勞。式厚珍頒。用扶吉履。

賜御前諸軍都統制時俊吳挺王琪郭剛李川皇甫倜郭鈞王明御前諸軍副都統制魯安仁翟

瓊王世雄岳建壽銀合夏藥勅書

夙懷偉略。分總成師。暑威方隆。軍事良苦。特致精嘉之劑。庶資調噐之宜。

賜靖海軍官吏軍民僧道耆壽等示諭勅書

朕以楊倓瞻智造微。宏材經遠。久宣勞於外服。旋登長於禁途。典賦名曹。具彰富國之績。通班延閣。稍遂奉祠之遊。茲錫寵於齋壇。亦增華於勳閤。諒聞休命。咸愜輿情。

賜南平王李天祚淳熙二年曆日勅書

朕欽授人時。裁成天道。丕徧同文之地。誕頒底日之書。迺眷藩方。夙恭侯度。尙祇予賜。庸惠爾民。

賜皇子判明州魏王愷金合臘藥勅書

分慶天潢。承流甸服。適屬風霜之勁。卽頒湯劑之良。庸示眷懷。庶扶福履。

賜浙東路安撫使錢端禮銀合臘藥勅書

政路耆臣。帥藩崇望。屬風霜之回薄。諒夙夜之勤勞。爰有寵頒。用資珍輔。

賜湖南路安撫使劉珙銀合臘藥勅書

望重政塗。寄隆邦翰。言念凝嚴之序。宜加調膏之宜。爰有匪頒。用昭眷遇。

賜湖北路安撫使沈夏銀合臘藥勅書

夙參樞畫。久布藩條。興言綏御之勤。適履凝嚴之節。爰推賜式。用輔珍調。

賜四川安撫制置使范成大銀合臘藥勅書

班華禁路。倚重坤隅。屬嚴籥之方寒。宜冲襟之是霑。特推頒賚。庸示眷懷。

賜主管侍衛馬軍司趙撙銀合臘藥勅書

夙提禁旅，茂建帥權。當寒序之凝嚴，宜冲襟之輔適。特頒良劑，庸表至懷。

賜御前諸軍都統制吳挺時俊王琪郭剛李川郭鈞皇甫侔王明御前諸軍副都統制魯安仁王世雄岳建壽翟瓊銀合臘藥勅書

嚴護邊衝，總提師衆。適履祁寒之序，永懷共武之勤。特致分頒，用資調衛。

賜福建路安撫使陳俊卿銀合臘藥勅書

鼎輔元臣，价藩崇望。適履凝嚴之序，深懷綏撫之勤。爰有分頒，庶資調衛。

賜皇子判明州魏王愷金合臘藥勅書

望重親賢，任隆蕃翰。屬風霜之方厲，諒夙夜之多勤。式示恩頒，用綏福履。

賜侍衛馬軍行司武康軍節度使侍衛馬軍都指揮使吳拱御前諸軍都統制吳挺等御前諸軍

副都統制韓寶等銀合臘藥勅書

總提戎旅，展罄忠勞。當氣序之嚴凝，宜精神之輔養。爰頒藥劑，式表眷懷。

賜江南東路安撫使陳俊卿銀合臘藥勅書

留籥地崇，帥藩望重。當嚴凝之方厲，諒綏撫之多勤。爰有匪頒，庶資冲衛。

賜福建路安撫使沈夏江南西路安撫使楊倓銀合臘藥勅書

夙秉中樞，荐分外寄。當寒威之增勁，諒藩事之宜勞。宜有恩頒，用資和衛。

賜兩浙東路安撫使李彥穎銀合臘藥勅書

望高舊弼。任重名藩。適涉序於隆寒。宜輔和於沖履。爰頒良劑。式表深懷。

賜成都潼川府夔州利州路安撫制置使胡元質銀合臘藥勅書

歲華向暮。寒氣增嚴。興言夕瑣之臣。專任坤隅之寄。爰推寵錫。用助珍調。

示諭保康軍官吏軍民僧道耆壽等勅書

天資純全。地望融顯。周旋法度之訓。被服德義之經。久於班聯。嘉乃端靖。已誕頒於英節。俾遙鎮於名藩。諒彼聽聞。同於慰喜。

賜皇子判明州魏王愷金合夏藥勅書

恩隆帝子。任重侯藩。屬當炎暑之辰。宜輔沖和之履。特頒良劑。庶表深懷。

賜侍衛馬軍行司侍衛馬軍都虞候馬定遠御前諸軍都統制吳挺等御前諸軍副都統制韓寶

等銀合夏藥勅書

炎簫載臨。暑威方熾。爰興懷於良將。適留戍於要衝。並有分盼。庶資調衛。

賜江東路安撫使陳俊卿銀合夏藥勅書

鈞鼎元臣。藩翰重寄。屬炎蒸之在序。諒綏撫之多勞。爰有嘉盼。用扶沖履。

賜成都潼川府夔州利州路安撫制置使胡元質銀合夏藥勅書

禁路舊臣。坤維重寄。適炎蒸之在序。諒綏撫之多勞。爰致嘉頒。用扶沖履。

賜大理卿賈選等獎諭勅書

獄者。人之司命也。朕傷夫教化之尙淺。使吾元元未盡知識。抵冒殊扞。陷於憲網。嘗選明察之官。忠信之士。惟良折獄。庶于無刑。汝等習於律章。傳以經術。亟問亟蔽。有要有倫。今狴牢之內。乃亡一夫之留。茲非朕心之攸懌。慮既達聽聞。良深歎美。

賜成都潼川府夔路利州路安撫制置使胡元質銀合夏藥勅書

帥閫寄隆。坤維地遠。當炎威之方盛。諒王事之良勞。爰有寵頒。俾資珍衛。

賜江東路安撫使陳俊卿福建路安撫使梁克家銀合夏藥勅書

宰路舊臣。价藩雅望。適履炎蒸之序。諒多綏御之勤。爰致寵頒。庶資調衛。

賜侍衛馬軍行司侍衛馬軍都虞候馬定遠御前諸軍都統制吳挺郭剛皇甫倜李□□田□卿

郭鈞王世雄御前諸軍副都統制□寶彭杲李彥孚劉光祖郭杲銀合夏藥勅書

分提軍旅。嚴護封疆。適當炎暑之辰。重起賢勞之念。爰加頒賚。俾厚珍調。

崔舍人玉堂類藁卷第十七

春端貼子

淳熙元年端午貼子詞

皇帝閣六首

五言

雙秀雲車實三眠雪繭豐無人知帝力渾在舜弦中。

又

御柳垂波綠宮槐覆幄涼香風隨步輦偏到殿中央。

又

采縷縈朱戶芳菰剪翠筒風光天上別景物世間同。

七言三首

千年桃印明金殿百子榴房照綺疏清曉宮門放魚鑰內家催進恤刑書。

又

幽芳拂拂朝香度密葉陰陰晝影圓玉食未應須角黍君王端是念忠賢。

又

雙人綠艾消民疹。五色朱絲奉帝齡。向晚封章都閱遍。翠輿初過水心亭。

淳熙二年春帖子詞

光堯壽聖憲天體道太上皇帝閣六首

五言三首

嶰管今朝應。璿杓昨夜旋。耕桑三萬里。一樣樂堯天。

又

事已高超古。心猶切爲民。慈顏應有喜。房宿正當晨。

又

采柏浮仙醪。凝酥點壽盤。君王千萬歲。長奉兩宮歡。

七言三首

九重雲氣鬱崔嵬。日轉青旗瑞色開。晨蹕一聲春又到。太平天子上瑤盃。

又

樓閣隔年餘舊雪。園林連夜著新花。東皇儼作行春計。先到長生大帝家。

又

景龍門上華燈動。黃鵠池邊翠浪通。一一春光須作主。從今二十四番風。
壽聖明慈太上皇后閣六首

五言三首

玉筵和聲度。金鋪麗景遲。思齊文母聖。春日受春祺。

又

寶殿春朝退。瑤池夜宴深。明朝是人日。時復問晴陰。

又

翠輦西湖路。雕盤北苑花。時平無外事。隨意趁年華。

七言三首

扇開雉影紅雲起。簾卷蝦鬚畫燭明。三十六宮齊進酒。盤金小勝樓長生。

又

日浴鳳沼搖波暖。雲護龍樓倒影長。讀罷黃庭無一事。好風吹動百花香。

又

院落韶光歸柳色。郊原耕信到蒿芽。望春臺下□□軟。不見游龍有外家。

淳熙六年春帖子詞

皇帝閣六首

五言三首

今歲韶光好。時逢大有年。條風方被物。菑葉又催田。

又

今歲韶光好。年中兩見春。餘寒九日在。芳意一朝新。

又

今歲韶光好。田間氣象淳。政平無橫賦。粟賤少窮民。

七言三首

東風先滿殿前旗。御柳宮花次第知。連夜芳心相待發。侵朝柔思不勝垂。

又

千門曉日山河麗。萬國春風草木香。造化無私隨發育。聖明天子是東皇。

又

彤庭清蹕轉輕雷。鳳管吹春入仗來。萬籟有聲皆善頌。八荒無地不熙臺。

皇后閣五首

五言二首

何處春來早。光風入九門。未鰲池苻翠。先著壁椒溫。

又

何處春來早。坤儀物意熙。煙生金屋重。日上玉階遲。

七言三首

明朝嘉氣滿慈闈。親侍君王獻玉卮。一樣酥盤俱手製。百般綵勝總春宜。

又

風光天上倍常殊。花壓闌干畫影舒。虛几自臨中令帖。明窗時展大家書。

又

清明小苑條桑地。和暖平川浴種天。聖主儉勤游樂少。只將敦朴示民先。

淳熙六年端午貼子詞

皇帝閣六首

五言三首

玉笋浮菖細。金盤薦朮香。皇齡千萬壽。高拱舜衣裳。

又

蘭氣浮丹殿。槐陰被紫宸。薰琴多在御。揮拂寄深仁。

又

清曉開魚鑰。紅雲繚繚間。催裁恤刑詔。傳放謝衣班。

七言三首

夜披章奏涼生扇。午對臣鄰汗浹衣。水閣風亭松竹邃。翠輿臨幸日來稀。

又

仁風長養羣生遂。化日清明百沴驅。桃印艾人消底用。殿心高設敬天圖。

又

避暑深宮消永晝。函風廣殿起涼秋。宸心未愜高明適。志在山東二百州。

皇后閣五首

五言二首

剪玉菰筒翠。盤金綵縷長。宮中多燕喜。天下正明昌。

又

瑞麥登時物。香蒲薦壽祺。珠囊新樣小。蹙就葛覃詩。

七言三首

闕草人歸午漏徐。宮簾不動玉窗虛。旋開藥笈尋仙典。閑點松腴試法書。

又

蠶館風清下箔時。六宮□從獻絲歸。便教淵室催機織。要及明堂製袞衣。

又

聖主恭勤少燕游。生衣趁得未明求。隨時但獻長生縷。當午猶閑競渡舟。

淳熙七年春貼子

光堯壽聖憲天體道性仁誠德經武緯文太上皇帝閣六首

五言三首

欲識春回處。長生大帝家。萬年枝聳翠。千歲果開花。

又

欲識春回處。君王獻壽時。喬雲扶寶座。和氣入瑤卮。

又

欲識春回處。晴峯俯碧泉。巖巒猶積雪。草木已生煙。

七言三首

冰消宿沼悠揚動。煙暖寒林約略青。試上龍樓回遠望。朝來生綠畫羅屏。

又

聚景園中芳意換。望湖樓下綠波長。顰眉自識車音美。時有細縈夾道香。

又

一氣暗隨鸞輅動。萬祥給會袞衣朝。康衢歌吹東風裏。滿聽兒童善祝堯。

壽聖齊明廣慈太上皇后閣六首

五言三首

天上春光別。東皇管領來。初從旗氣轉。旋逐蹕聲回。

又

天上春光別。融融物態宜。彤庭花氣煖。黃道日輪遲。

又

天上春光別。時康樂事繁。煙花浮闕苑。露葉簇金盤。

七言三首

蒼龍擎輦道春回。盡把韶華入酒盃。但見殿前移仗退。已聞苑內奏花開。

又

玉壓闌干日影長。雲窗侍女畫焚香。琅函自檢長生籙。金管時書急就章。

又

花邊破日紅千疊。柳際勻煙翠一層。閱盡風光長不老。綠車當見從雲仍。

淳熙七年端午貼子詞

皇帝閣六首

五言三首

赤伏祥暉盛。黃離治象亨。天時四序正。君德萬方明。

又

采縷盤金麗。香蒲鑲玉勻。君王千萬壽。歲歲樂茲辰。

又

日御秋永。雲峯疊疊繁。宸心定忘暑。長筭入中原。

七言三首

光浮水檻虛黃蓋。涼滿冰臺待翠輿。日轉槐龍天近午。汗衣猶聽講筵書。

又

松碧涵風清度曲。梅黃過雨密留陰。翠寒堂上全無暑。定起人間扇暍心。

又

黃道星辰移企翼。青冥風露近飛簷。翠華晚過凌虛殿。一色明珠十二簾。

皇后閣六首

五言二首

玉燕垂符小珠囊結艾青。更將長命縷。侵曉奉慈庭。

又

厚德承三殿。柔風被入絃。欲知勤儉化。當暑澣衣清。

七言三首

玉笋浮菖追令節。寶箱儲藥趁靈辰。細開角黍詢前事。應助吾皇念直臣。

又

日永苕池閑畫舫。風清蠶館入新絲。內人鬪草歸能說。今歲山中艾出遲。

又

翠雲幕卷迎風殿。零露盤高待月臺。應上君王千萬壽。霓裳吹下九天來。

淳熙八年春帖子詞

太上皇帝閣六首

五言三首

翠管吹寒去。青旗卷仗來。慈皇千萬壽。春日上春盃。

又
剪玉酥花細。盤金綵勝宜。六宮呈妙巧。春日頌春祺。

又
鳳苑開丹燕。龍樓下翠華。天工不敢住。春日著春花。

七言三首

親提神器授今皇。帝德王功日日昌。萬宇熙臺無一事。湖山好處賞風光。

又

今歲東皇作意遲。春朝恰近上元期。長生宮殿花開了。便放人間十萬枝。

又

高蹈殊庭二十春。隨時游樂爲同民。翠輿黃傘西湖路。老穉年年喜望塵。

太上皇后閣六首

五言三首

春曉慈闈啓。君王奏問安。和聲調嶰管。歡頌獻椒盤。

又

春晝慈闈靜。宮簾日上徐。焚香開竺典。滴露寫仙書。

又

春夕慈闈永。瑤池樂未央。管弦聲合奏。燈月影交光。

七言三首

昨夜三更斗柄旋。東風催放百花鮮。飛來峯下浴新綠。流得春光到外邊。

又

鬱葱嘉氣滿蓬萊。天子雙稱萬壽盃。朝罷樂音迎複道。珣輿同上望春臺。

又

有象并平屬好春。九衢歌舞樂芳辰。濯龍門外車如水。應笑豪華漢外親。

淳熙八年端午貼子詞

太上皇帝閣六首

五言三首

待月長生殿。迎風太液池。慈顏歡樂日。聖德盛明時。

又

濯濯風涵柳。英英露瀉荷。微涼無限意。分付舜弦歌。

又

蓮葉看龜上。桐花引鳳棲。聖人千萬壽。福祿與天齊。

七言三首

采索謾縈長命縷。紫芽安用引年萸。只將三紀休兵德。聖壽宜同泰華長。

又

了無塵累可關情。坐見寰區樂太平。弄水看花聊燕適。倚松餐菊偶經行。

又

竹殿陰陰間綠槐。日長碁罷看流盃。北窗風味沈沈靜。南內時新節節來。

太上皇后閣六首

五言三首

菰黍團雲白。菖花剪玉長。晚涼新月上。水殿按霓裳。

又

海上千年實。峯頭十丈花。年年當令節。同獻玉皇家。

又

翰墨消長日。尊罍占遠風。纖塵吹不到。人在玉壺中。

七言三首

寶月驂鸞采結垂。朝來新寫上皇詩。金盤有露涼生早。玉宇無塵凍解遲。

又

水晶宮闕淨涵虛。歷歷南風度玉除。金井轆轤聲欲曉。內人來奏問安書。

又

萬年枝下綠陰長。拂石時來坐晚涼。別殿笙歌催宴早。千門鋪月靜焚香。

崔舍人玉堂類藁卷第十八

致語口號

樂曲附

金國使人到闕紫宸殿宴參軍色致語口號勾合曲詞

致語

琬圭修聘。方申締於歡盟。雕俎均恩。爰肆陳於慈燕。肅簪紳而拱極。儼旒冕以當天。洪施豐融。輿情樂豈。恭惟皇帝陛下。建中布度。執競凝圖。英略淵通。昭徹天人之表。深仁溥博。際蟠宇宙之間。旁開衆正之門。廣闢太平之路。念寶鄰之永好。嘉虜使之多儀。置帳于神麗之庭。下輦于明光之殿。風回鳳蓋。密瞻煥爛之容。日度鼇峯。屢轉華旗之影。寫淳音於調露。汎嘉氣於流霞。君臣歡康。中外寧壹。臣叨居法部。幸際臨辰。上奉宸顏。敢進口號。

口號

春風黃繖下清廂。纓弁蟬聯宴未央。萬國文明周禮樂。九重端穆舜衣裳。雲低殿幄星辰近。漏轉宮花日月長。聖主寬仁盟好永。和聲細入鹿鳴章。

勾合曲

曉日周原。念使駢之勤勤。春風漢殿。開燕席之從容。筍簾畢陳。笙鏞間奏。式遂莘魚之樂。聿來祥鳳之儀。

上悅宸顏教坊合曲

金國賀正旦使人到闕紫宸殿宴致語口號勾合曲詞

致語

周曆誕頒。適履端於令旦。漢儀高會。爰示惠於羣臣。清光粹溫。協氣充塞。恭惟皇帝陛下。體元御極。贊化宜民。當三陽開祚之辰。展萬壽稱觴之禮。臣等恭陳口號。仰奉宸歡。

口號

九重帳殿敞層空。清曉羣臣宴鎬宮。神護翠華居北極。春隨黃傘下東風。觴行隱隱紅雲裏。仗轉瞳瞳瑞日中。看取乾坤俱壽域。兩朝時節聘車通。

勾合曲

和樂在陳。嘉觴當御。日度層峯之影。風回廣殿之春。上悅天顏。教坊合曲。

金國賀會慶聖節使人到闕集英殿宴致語口號勾合曲詞

致語

冬權肇始。陽月就盈。當真人誕育之辰。正寶曆明昌之運。皇帝陛下。樂同萬國。禮厚羣賢。啓惠燕於端宸。流恩光於廣坐。君臣相悅。福祿無疆。臣等上奉天顏。敢進口號。

口號

良月欣臨震夙辰。恩涵雨露燕羣臣。遙連漢岳三呼應。徐聽虞韶九奏淳。仙篆縈風浮廣殿。卿雲擎日護嚴宸。奉觴更喜嘉賓會。同祝吾皇萬壽春。

勾合曲

丹扆天臨。華簪雲會。旣洽莘魚之樂。宜觀韶鳳之儀。上悅宸顏。教坊合曲。

金國賀正旦使人到闕集英殿宴致語口號勾合曲詞

致語

斗轉璿穹。序正夏時之統。星環寶座。儀陳漢殿之圖。嘉生阜繁。協氣充塞。恭惟皇帝陛下。聰明天錫。剛健時行。對昌會之亨通。同羣情之燕樂。臣等輒收輿誦。盡入歡謠。

口號

殿頭清蹕起晴雷。萬歲聲中扇影開。曉日青旗明絳闕。春風黃傘傍瑤臺。卿雲湧瑞扶天座。仙露流甘入御盃。要識八荒俱壽域。年年常看使星來。

勾合曲

華幕張庭。翠裘臨座。旣洽嘉賓之樂。宜聞治世之音。上悅天顏。教坊合曲。

會慶聖節使人到闕集英殿宴致語口號勾合曲詞

致語

冬律乘乾。皇圖開泰。千載慶生商之旦。四方同戴舜之心。撫運隆昌。對時康乂。轉丹輿於廣殿。張翠幄於彤庭。雨露涵濡。風雲際會。臣等輒陳歡誦。仰奉威顏。

口號

雲護輕霜漏曉晴。日高黃傘影亭亭。六龍衛蹕來臨座。五鳳儀韶下舞庭。地湧南山朝帝殿。天回北斗揭仙醺。侍臣近識宸顏喜。時願皇皇二使星。

勾合曲

景轉繪峯。香浮黼座。既上萬年之壽。當條九奏之音。

致語

周官頒曆。正月之吉始和。漢殿登圖。諸福之物畢至。恭惟皇帝陛下。剛明獨運。慈儉安行。應乾坤交泰之辰。合君臣相悅之樂。鸞觴當御。鸞羽分庭。臣等敢酌民言。用成口號。

口號

四時和氣轉洪鈞。昨夜璿杓正指寅。萬玉鳴班朝廣殿。五雲扶輦下端宸。翠旄低引仙韶度。寶綬徐傳御醴醇。看取年年來信使。定知天地一家春。

勾合曲

日轉龍峯。雲低鳳蓋。流人間之歡詠。入天上之和聲。

金國賀會慶節使人到闕集英殿宴致語口號勾合曲詞

致語

天開景命。璿樞應千載之符。時協昌辰。玉殿獻萬年之壽。恭惟皇帝陛下。神謀高運。仁德安行。受福無疆。垂虞裳而臨正。寧與民同樂。開鎬燕而集羣臣。流仙露以溶津。結卿雲而駐采。臣等敢緣嘉會。輒貢蕪詞。

口號

盛節簪紳宴玉京。紅雲深護赭袍明。寶花合座天香滿。仙羽分陳御筵行。原隰有光交信睦。廟堂無事樂和平。歡心協氣知多少。盡在今朝九奏聲。

勾合曲

萬歲稱觴。已祝聖人之壽。九成合奏。宜揚治世之音。

金國賀正旦使人到闕紫宸殿宴致語口號勾合曲詞

致語

臣聞帝執規而布治。萬物俱榮。王在鎬以示慈。羣情皆樂。乾剛高運。豐照端中。撫邦家晏粲之辰。應天地亨嘉之會。彤庭合弁。迎義馭之舒長。寶座傳觴。況衢尊之多旨。臣等欣逢令旦。冒貢蕪詞。

口號

東風初滿殿前旗。環珮春容侍燕時。帝澤普涵春自暖。人心同樂日先遲。三峯影裏瞻黿動。九奏聲中看

鳳儀更喜使華齊獻壽。八方何地不熙熙。

勾合曲

仙羽分庭。宮花覆座。旣洽惠慈之樂。宜揚皦釋之音。

金國賀正旦使人到闕紫宸殿宴致語口號勾合曲詞

致語

臣聞五始書正。集嘉祥於華旦。萬年稱壽。望睟表於中天。惠燕雲需。歡聲雷動。恭惟皇帝陛下。聖神廣運。慈儉安行。政布青陽。對三朝之亨會。恩垂湛露。流四海之深仁。臣等仰悅宸顏。俯陳口號。

口號

仗轉瞳瞳曉色。嗽千官齊望赭袍尊。食苹鳴鹿迷天樂。泳藻游魚沐聖恩。香泛流霞涵雨露。春隨和奏滿乾坤。使華同上南山壽。近識宸顏一倍溫。

勾合曲

玉醴飛觴。金壺緩箭。宜合虞韶之奏。更均鎬燕之歡。

六州

商秋吉。嘉會協中辛。涓路寢。修禋祀。聖德昭清。端志慮。罄竭齋精。錦繡排天仗。羽衛繽紛。朝太室。返中宸。被袞接神明。時平天地俱清晏。兼豐年和氣。品物達芳馨。瞻煊座。春容娛燕三靈。奠瑤爵。薦量幣。清思呦。

冥冥望昆侖。嘉祥塞網緼。誠殫禮洽慶休成。潤澤被生民。端門肆眚。听庭稱賀。俱將景福萬壽祝雙親。

十二時

助華竝天胙。昌期聖德茂重離。英明經遠。濬哲昭微。寶儉更深慈。觀萬國累洽重熙。對明時報禮秩。神祇玉帛奏華夷。雍肅顯相。百辟各欽祇。奄嘉虞英壁奠華滋。神安坐。景氣澄虛極。光燄燭長麗。展詩應律。萬舞逶遲。三獻洽皇儀。垂靈寢慶祐來宜。禮無遠。鳴鑾臨帝闕。飛鳳下天倪。清和寰宇。霈澤一朝馳。醇化無爲。萬祀鞏洪基。

登門肆赦皇帝升御座宮架奏黃鍾宮乾安之曲

大禮備矣。鑾車闐闐。帝來維何。賁及幅員。有聲伊肅。有容伊虔。彼雉斯開。帝坐中天。

皇帝降御座宮架奏黃鍾宮乾安之曲

帝坐中天。流澤演迤。厥蒙伊民。歌舞以喜。澤流普矣。民喜偕矣。駕言徂歸。福祿同矣。

太祖皇帝位酌獻登歌作大呂宮彰安之曲

一德開基。百年垂統。中天禘郊。薄海朝貢。寶龜相承。器鼎加重。澤深慶綏。帝復命宋。

皇帝入小次宮架奏黃鍾宮儀安之曲

匏尊既舉。蘇席未移。有德斯顧。靡神不娛。物情肅穆。天宇清夷。宅中受命。永復邦基。

亞獻宮架奏黃鍾宮穆安之樂威功睿德之舞

四阿有嚴。神旣戾止。備物雖儀。潔誠惟己。有來振振。相我熙事。載酌陶匏。以成恣祀。

送神宮架奏圓鍾宮誠安之曲一成

奕奕宗祀。煌煌禮文。高靈下墮。精意升聞。熙事旣畢。忽乘青雲。敢拜明況。永清世氛。

皇帝還大次宮架奏黃鍾宮憩安之曲

應天以實。已事而竣。毳案朝帝。竹宮拜神。靈光下燭。協氣斯陳。福祿時萬。基圖日新。

皇帝上太上皇帝壽樂曲

陞坐用聖安之曲

簪纓列序。羽衛分行。雉扇爰徹。天威煒煌。清明在躬。顯顯昂昂。咸拜稽首。萬壽無疆。

公卿入門用禮安之曲

端闈肅啓。金奏和聲。有來濟濟。燁其華纓。度中規矩。步協英莖。一人達孝。百辟丕承。

皇帝上太上皇壽酒用福安之曲

笙鏞皦皦。簋簠騰騰。奉觴介壽。龍袞黼裳。盛儀克舉。至德用章。刑于四海。化洽風揚。

上壽用崇安之曲

凝旒肅穆。鳴佩春容。有酒伊醕。管磬其從。典禮絢縟。威儀恪共。頌堯之壽。與天比隆。

太上皇帝初舉酒用蟠桃之曲

結根閬苑登瑤池。紅雲駢艷瑞露含。滋味參石髓。名配松脂。王母一笑河水漣。瀾再舉酒用大椿之曲

培植自古質。淳以全。凌傲霜雪。盤薄風煙。朝菌焉識。楚莫詎肩。聳柯擢幹。終古蒼然。三舉酒用瑞鶴之曲

彼肅者羽。名紀仙經。芝田下啄。容止安停。引吭警露。響徹青冥。聖德格物。來儀帝庭。四舉酒用祥龜之曲

粵有靈物。負圖效祥。蓮棲蒼宿。錦文有章。天和發越。睿澤滂洋。汭于官沼。美應昭彰。五舉酒用老人星見之曲

奕奕南極。應期曜靈。祥暉昭衍。次丙躔丁。事垂漢史。名著甘經。錫符祚聖。億萬斯齡。降坐用福安之曲

慶典具舉。皇慈溥將。禮光長樂。事掩未央。佩環濟濟。金石鏘鏘。天容有懌。言旋建章。羣臣酒三行竝用正安之曲

曉日敞天門。星環萃盡簪。明良賡舜日。富壽祝堯心。穿仗搖旗影。鳴珂混樂音。聖朝敦孝理。百辟盡丕欽。繚綈殿中央。紅雲捧紫皇。香風飄綵仗。仙露滴霞觴。樂度儀鳳曲。恩流振鷺行。萬年天下養。寶祚享靈長。清漏滴彤壺。皇仁雨露濡。遙瞻天一笑。同効岳三呼。御醴傳觴速。宮花覆座敷。欲知歸美意。歌頌在康衢。

酒一行罷用萬壽無疆之舞

三紀御圖。道豐德盛。化洽兆民。功光列聖。畀託有歸。脫屣萬乘。優游法宮。頤神養性。岿岿具闕。豐麗靖淵。游神象外。玩意物先。爲衆父父。尊榮配天。大福備祿。何千萬年。

酒再行罷用聖德重光之舞

於穆聖子。仁天智神。體剛立極。寶儉化民。美政畢舉。舊章聿遵。舞以象德。儼韶實倫。龍樓問寢。前殿奉扈。密承慈訓。不怠其祗。海宇豐阜。邊陲晏夷。于以養志。福祿來宜。

崔舍人玉堂類藁卷第十九

祝冊詞表

明堂大禮祭享皇地祇冊文

博厚載物。靜專承天。溥彼羣生。裕于大化。欽念菲質。紹承慶基。山川晏寧。稼穡蕃阜。膺受靈顧。不敢怠遑。練吉商辰。修報世室。奠以黃玉。薦以黝牲。承神至尊。精意孚盡。臨錫景福。垂休無疆。

太祖配享冊文

五代腥聞。萬姓請命。誕降眞主。風揮日舒。方夏載寧。彝倫攸序。天德地業。詒厥子孫。傳及眇冲。嗣守神器。夙夜祇畏。思昭大猷。報本返初。無物可稱。宗祀世室。陟配兩儀。威神在天。右序罔極。

太宗配享冊文

維聖肇造。維明纂承。廣聲昭功。混壹函夏。文熙武鬯。底于丕平。世承慶休。施逮眇德。是述是紹。不敢□□。金行肅秋。歲物告阜。祇舉彝典。大饗合宮。明明祖宗。竝侑于坐。來燕來止。綏福萬邦。

明堂大禮修整雅飾太廟畢土時前奏告祖宗帝后神主還殿室祝文

祀展合宮。享先太室。嘗畢加於修飾。已具益於神深。敢告前期。將伸還奉。

安穆皇后安恭皇后祝文

具嚴闕宇。祇妥靈遊。屬當大饗之期。嘗飭加修之役。逮茲訖事。敢以告虔。

正奉安祖宗帝后神主祝文

崇崇總章。戒于大饗。奕奕清廟。謁以先期。既庇役以圖新。爰涓辰而還御。敢孚誠意。庶安神遊。

正奉安懿節皇后祝文

明堂孔陽。精禋是舉。闕官有恤。虔饗攸先。嘗祇戒於繕修。茲具觀於嚴靜。敢涓良日。永安靈遊。

安穆皇后安恭皇后祝文

宗祀維時。先期是饗。嘗加修於闕宇。庶具藏於禮容。茲告訖功。敢祈旋位。

明堂大禮畢皇后賀皇帝表詞

觀時亨會。酌千古之彌文。遵國彝章。展九筵之嘉饗。禮儀既備。慶賜遂行。恭惟皇帝陛下。聖孝日勤。皇仁天覆。據域中之位。盛德通於明神。采汶上之圖。美報修於元祀。四方來賀。萬壽無疆。妾正體坤儀。承休軋運。當告成於熙事。實倍喜於柔悰。

皇帝答皇后詔本

朕祇通舊章。肅稱元祀。嘉氣被乎重屋。美光燭乎崇筵。神靈燕虞。福應顯見。欽荷博臨之況。愈深寅畏之懷。遽覽奏陳。具形贊喜。重爲披閱。良集褒嘉。

天慶觀預告五嶽四瀆祝文

涓辰商籥藏事。總章重循。眇躬曷究盛典。卽此祕宇。告于羣神。尙祈孚休。汔遂成禮。

雷神雨師祝文

國家宗主百神。稱秩羣祀。凡以芘佑生民也。今自夏愆澤。越秋亢陽。雨猶不滋。苗將卽槁。神掌茲事。寧忍弗圖。側躬焦勞。用以誠薦。

天地

蓋聞王者正五事以承天心。乃雨暘以時。民用樂康。永念眇躬。奉承基緒。維德弗逮。無以感通陰陽之和。乃自夏秋之交。旱魃爲虐。良疇沃壤。皆爲焦原。嗷嗷下民。行且艱食。慮念憂灼。罔識所圖。是用飭遣大臣。請于天地之靈。願垂畀矜。亟賜膏澤。使稼穡中熟。民獲免於阻饑。敢不夙夜寅畏。以承嘉休。

社稷

維國家秩祀社稷。所以助生萬物也。今自夏乃秋。農壤匱澤。滌滌旱野。播爲埃塵。民情焦然。行且艱食。永思厥咎。夙夜兢畏。無以感回天心。維神國之尊奉。民之依賴。其尙應時消沴。以惠福于我有邦。吁嗟以請。庶其鑒之。

別廟懿節皇后祝文

安穆安恭皇后

同嗣改慈德
作后德

茲緣旱虐。浸害農田。竝告神靈。庶蒙膏潤。欽惟慈德。孚佑我家。迄臻順成。實藉陰相。

五嶽四瀆祝文

自夏亢陽。越秋匱澤。早旣太甚。民將亡聊。寅念山川之神。寶司雲雨之柄。祀垂萬世。望冠百靈。適災沴之已長。豈神明之弗恤。願垂嘉應。汔底豐年。庶宏濟於民生。當永虔於邦禮。

十神太一祝文

行基布氣。福庇兆民。闔宇棲真。禮崇羣祀。適屬愆陽之序。已深艱食之虞。敢竭齋明。用通靈應。願下九天之御。亟垂三日之霖。盡起棄苗。頓還豐歲。吁嗟以請。庶矜佑之。

宗廟

寅念涼德。奉承丕基。無以感通神祇。消弭災異。乃夏秋之交。旱魃爲虐。良疇沃壤。胥爲焦原。嗷嗷羣情。行且艱食。慮念憂灼。罔識所圖。惟祖宗在天之靈。矜哀下民。畀佑膏澤。使歲得中熟。民獲免於阻飢。敢不夙夜祗栗。以承嘉休。

九宮貴神

惟神道參上帝。德芘下民。稽按靈典。實專主風雨霜雹之事。此國家所以虔共奉祀以迎嘉休也。今夏秋亢陽。勢旣太甚。滌滌旱野。嗷嗷民情。化災爲穰。功在頃刻。輸誠以告。庶矜佑之。

皇帝進奉太上皇后生辰表詞

金風扇物。王商籥之佳辰。玉殿稱觴。紀慈闈之誕序。三神合慶。四海交驩。恭惟履德謙恭。游心清靜。啓塗

山而輔贊。蚤濟中興。坐少廣以逍遙。晚偕難老。屬臨令節。益介純祺。臣祇荷親仁。紹承邦緒。萬年康壽。方修視膳之勤。百葉雲仍。更祝含飴之樂。

皇帝進奉太上皇后生辰功德疏

祥開沙麓。慶千載之昌期。教藏琳宮。輯九天之妙果。爰申頌祝。益罄齋明。云云。恭願百順雲臻。萬祥川至。享無量福。永延昌熾之休。會長生君。同樂清虛之境。

春分前修整補種奏告昭慈聖獻皇后攢宮永祐陵攢宮表文

義律和聲。正協鳴庚之序。漢陵王氣。已成拱木之陰。爰及芳辰。俾加庶役。是遵彝典。敢告先期。

安恭安穆皇后攢宮祝文

金屋長遠。玉衣永闕。適及融和之序。當加修治之宜。庀役維時。涓辰是告。

仲春修整修換殿室什物并補種窠木奏告昭慈聖獻皇后攢宮永祐陵攢宮表文

肅瞻吉兆。近在勝區。春事方興。宜加於締葺。靈旂是宅。實慮於震驚。敢告役期。庶孚神監。

顯恭皇后表文

增嚴仙寢。遵用彝章。事役得宜。已涓於良日。神靈貴靜。爰告於先期。仰冀永寧。俯垂丕福。

安穆皇后安恭皇后攢宮祝文

春律將中。國章是舉。爰增嚴於域兆。已夙戒於工徒。涓辰既良。先事乃告。

奏告徽宗皇帝神帳朱漆暗淡起剝合行重朱換殿脊攔損爛告遷神御權安奉表文
肅瞻仙域近在輔藩帳座黯昏合加顯設殿楹弊腐仍俾更新涓時日以卽工奉衣冠而移御具敷誠悃
虔妥威靈

奏告顯恭顯肅顯仁皇后神帳朱漆暗淡起剝合行重朱告遷神御權安奉表文
同前表文威靈改作光靈

橫宮下宮疎漏繚瓦祭告告遷安恭皇后神御於殿東廊權奉安祝文

眷彼寢封戒茲工役當奉遷於靈御庶事妥於真游爰卜良辰敢伸虔告

奏告徽宗皇帝神帳重行朱漆并重換殿脊攔畢工告遷神御還殿正奉安表文

禹山神麗漢寢崇深鳩役加修用嚴弓劍之地涓辰告備復妥衣冠之遊爰布誠忱虔通靈鑒
奏告顯恭顯肅顯仁皇后神帳重行朱漆畢工告遷神御還殿正奉安表文

慈德在天真遊有所近加賁飾嘗遷寓於神靈今告鼎新庶永寧於容御既涓良日敢布丹衷

太常寺申撰成都府新繁縣裝飾六朝御容衣紋及修飾殿宇奏告祝文

坤維地遠嘗寫真容繪事工深儼存遺範慨棟楹之歲久慮冠劍之塵侵因飭更新用嚴崇奉既鳩庶役
敢告前期遐想威靈默通誠素

崔舍人玉堂類藁卷第二十

祝冊詞表

春分前繕修補種奏告昭慈聖獻皇后攢宮永祐陵攢宮表文

禹會名山。漢陵勝兆。春陽方動。適稽按於彝章。工役當興。慮震驚於眞御。敢涓良日。祇告前期。冀寧宅於仙區。訖敷遺於後利。

安恭安穆皇后攢宮祝文

瞻懷丘寢。嚴奉容衣。春事旣興。國章攸舉。考日茲吉。僦工是宜。維安而寧。敢前以告。

祭告安恭皇后爲下宮殿內陳漏宿飭風畢工告遷神御還殿正奉安祝文

遡瞻仙域。近在勝區。旣殿宇之圖新。宜容衣之還御。敢涓良日。庶妥靈遊。

奏告懿節皇后神帳朱漆暗淡起剝并帳座損爛及架攔走起修換重行竿正告遷神御權安奉表文

仙寢成陰。神遊安位。屬舉繕修之事。深懷震動之虞。敢卽先期。暫移靈御。俟畢成於庶役。卽還奉於眞容。奏告懿節皇后神帳朱漆暗淡起剝并帳座損爛及後架攔走起修換重行竿正畢工告遷神御還殿正奉安表文

頃緣庀工。嘗告遷御。官師肅給。既徒役之時休。帳殿靖深。宜靈神之邁返。敢涓良日。用達丹誠。庶安侑於真遊。益綏成於景福。

報謝天地祝文

比以驕陽。浸成重眚。嘗極吁嗟之請。冀回眷佑之仁。於遂感孚。日聞霑洽。農畝間成於中熟。漕渠悉底於大通。爰竭誠衷。用伸報禮。

太廟祝文

眷佑二字改作顧佑字。餘同前

社稷祝文

眷佑二字改作鑒佑字。餘同前

太乙文同社稷

九宮貴神祝文同社稷

五嶽五鎮祝文

比者驕陽煽沴。時雨愆期。閱此下民。瀕於艱食。竝走羣祀。畢輸丹誠。迄蒙靈休。旋獲嘉潤。農畝間熟。河流大通。敢涓剛辰。用謝昭貺。

四海四瀆祝文同前

雷神雨師祝文同前

別廟懿節皇后祝文

比緣旱魃。浸害農疇。嘗布誠忱。庶回休應。迄臻霑洽。遂慰焦勞。敢涓剛辰。用謝靈貺。

安穆安恭皇后祝文

進呈安奉前二日奏告景靈宮中後殿祝文

書成良史。篇奏法官。紀四聖之宏規。垂萬年之偉範。事關廟社。慶集臣民。將謹寶藏。敢祈孚鑒。

閏三月旦望起居景靈宮諸神御并永祐陵攢宮昭慈聖獻皇后攢宮會聖宮等表詞本

諸帝旦表

生民之道。要在正時。附月之餘。乃維置閏。式因朔旦。庸舉國章。恭惟恭儉寬仁。聰明齊聖。垂子孫而作則。參天地以成能。茲履昌辰。益懷遺烈。爰致吉蠲之饗。用伸感慕之誠。

諸后旦表

月分重管。日累餘躔。晦明之數。罔愆。寒暑之宜。遂正。恭惟化參坤育。功濟乾行。道德流長。永錫蕃昌之福。歲時運往。空懷遐邇之靈。敢率彝章。用修芳薦。

諸帝望表

振美於辰。適春華之方盛。歸奇於劫。乃天道之有成。恭惟恩浹綿區。德高邃古。銅渾度正。方遵政教之常。

金鼎光寒。徒望威靈之遠。

諸后望表

斗杓斜指。既協芳辰。月魄中圓。又當良日。恭惟倪天表異。儼極功高。流美化於四方。貽徽音於萬世。敢陳嘉薦。庶達丹誠。

孟夏車駕詣景靈宮朝獻祝香文

盛德日升。洪休川至。建無前之美業。鞏不拔之丕基。

孟冬車駕詣景靈宮朝獻祝香文

皇圖安永。帝業隆昌。慈闈申萬壽之休。寰宇共三登之樂。

太陽交蝕祭告祝文

太史有言。日食在朔。深惟變異。不遑寧居。伐鼓用牲。國有彝典。消弭厥咎。繫神之休。

太陽交蝕祭謝祝文

太陽當虧。是謂變異。竝舉常典。側躬省修。重除蔽霄。潛護光體。神實賜況。敢忘薦誠。

孟春車駕詣景靈宮朝獻祝香文

皇圖天大。聖德日躋。兩宮永享於壽昌。萬國咸臻於康富。

孟春車駕詣景靈宮朝獻祝香文

邦圖鞏固。親壽延昌。三邊仍偃革之安。萬國遂登臺之樂。

孟夏車駕詣景靈宮朝獻祝香文

三邊安靜。五穀順成。凡居覆載之間。咸享和平之福。

明堂大禮禮畢車駕詣景靈宮恭謝祝香文

禪將太室。宗祀合宮。慶盛禮之熙成。擁嘉祥之滋至。云云伏願德參五帝。功冠三王。邦國開不世之基。親壽介無疆之福。

告謝五嶽四瀆祝文

蒐講彌文。紹修元祀。霽霖雨於先夕。燭靈光於嚮晨。迄底休成。實多陰相。敢陳芳薦。竝答殊休。

孟春車駕詣景靈宮朝獻祝香文

民生康阜。親壽綿長。三邊臻偃革之安。萬國遂登臺之樂。

太常寺申撰進呈安奉三祖下上五世宗藩慶系錄真宗皇帝玉牒奏告青詞

鉅典時脩。有司告備。昭列聖蕃昌之緒。修真皇盛大之休。已涓卜於剛辰。用闕藏於邃宇。仰祈淵鑒。永覆不圖。

安奉奏告中後殿祝文

祇涓吉日。登進成書。慶述祖宗。將謹寶藏之永。事關社廟。敢忘昭告之勤。仰冀靈觀。俯垂孚鑒。

孟夏車駕詣景靈宮朝獻祝香文

伏願基圖鼎固。功業川增。親庭膺萬壽之休。海宇遂三登之樂。

孟秋車駕詣景靈宮朝獻祝香文

帝業隆昌。皇猷光大。盡恢文武之境土。永垂堯舜之衣裳。

孟冬車駕詣景靈宮朝獻祝香文

福祥川至。功業日新。居中土以制四方。開明堂而朝萬國。

孟春車駕詣景靈宮朝獻祝香文

治功日進。聖壽天齊。盡恢故境之廣長。永奉慈庭之康樂。

孟秋車駕詣景靈宮朝獻祝香文

伏願四方安泰。五穀豐登。躋治効之隆昌。奉親顏之歡樂。

孟冬車駕詣景靈宮朝獻祝香文

二氣敷和。三靈駢福。嘉雪消餘年之疵癘。慶雲占嗣歲之豐登。

明堂奏告天地宗廟社稷別廟祝文

祗承親訓。稽協邦常。因萬物之成秋。舉九筵之茲祀。仰祈昭鑒。虔告先期。

宗廟祝文社稷祝文

昭鑒改云孚鑒。

別廟祝文

參講上儀。肇修宗祀。已卜涓於嘉序。嘗飭戒於先期。爰率故常。竝伸預告。

奏告五嶽四瀆祝文

四首一詞係路通去處

遵用彝章。紹修宗祀。卜涓時日之吉。敷告山川之靈。庶達虔誠。竝孚聰鑒。

祭告五嶽四海四瀆祝文

九首一詞係路未通處

肅涓嘉序。祇事合宮。慨疆域之未還。瞻山川之尙遠。竝陳芳薦。遙告先期。

明堂大禮前二日朝獻景靈宮分詣奏告中後殿祝文

紹承慶運。蒐講上儀。循三歲之彝章。舉九筵之親祀。敢先信宿。祇款神靈。庶達明誠。竝垂孚鑒。

後殿祝文

練吉商辰。躬祠世室。翕來四海之助。昭格三靈之歡。敢飭前期。祇修嘉薦。仰祈丕佑。永庇昌圖。

青詞

紹舉明禋。已涓辰而展采。祇循彝典。敢先事以告虔。肅仰真風。口扶丕緒。冀鑒臨於精意。益申錫於純嘏。

奏告諸陵帝后及昭慈聖獻皇后櫝宮永祐陵櫝宮表文

荷天休命。當修大報之常。稽古彌文。肇舉合宮之饗。茲遡瞻於真域。敢祇告於先期。爰達丹誠。庶孚靈鑒。

奏告安穆皇后安恭皇后攢宮祝文

三歲親祠具存常典九筵宗祀丕講上儀飭事維虔先期是告

倣漢魏至唐爲鏡歌鼓吹曲十二篇以述祖宗功德之盛見稱於時又以司馬公資治通鑑於治亂得失忠邪善惡有所未論者凡一君之後爲總說一代之末爲統論成六十卷號通鑑要覽皆以奏御而上命公更定呂祖謙所編文鑑中羣臣奏議其增損去留率有意義有文集三十卷內外制藁二十三卷奏議總要五卷制海十編鑑韻五編藏于家官自朝奉大夫贈中大夫年僅四十有四母陶氏贈安人娶將作少監錢俟之女封安人一男子端學十一歲四女子長及笄餘尙幼方公兄之沒也公悼之甚□□已之恩□與其姪□錢夫人遂拾遺澤以成公之□故其葬也士友相率爲之請銘是重可哀已銘曰
惟文之修言乃立學而能通濟以識細焉歌詩□□冊皇猷帝謨資潤色猗嗟崔公學允力辰哉遇聖□斯赫玉堂增官首其直溫然珪璋蘊其德從橫詞林論皆益帝眷之隆且丞弼年方剛強衆所惜生淮之孺葬于溧

此文當是舍人墓誌原本殘闕第有一頁而字亦多刵今無別本可校補姑存之於後天瀑識

崔舍人附錄

告詞

除祕書省正字告

乾道九年二月二十五日王淮行

勅左宣教郎林枏等。朕聞三館以待方聞之士。異時詞臣講官。與夫司言責。掌諷議。爲時名臣者。由此塗出。故擇之必精。試然後命。所以重其選也。以爾枏博學而多聞。爾彌大方重而有立。爾敦詩閱毅而不回。振藻儒林。見謂國器。奏篇來上。煥乎可觀。宜從英俊之遊。往司是正之職。益務涵養。以副朕知。可。

進中興會要轉宣教郎告

乾道九年十月十四日王淮行

勅左迪功郎守祕書省正字陳自脩等。昔司馬談爲太史。方天子建漢家之封。而留滯周南。以所欲論著。屬其子遷。於是紬石室金縢之書。而史記作焉。蓋抱良史之才。當筆削之任。遇大典冊。曾不得措辭其間。可勝惜哉。惟我太上皇帝。中興盛典。講於俶擾之際。得於授受之日。固已越商周而追唐虞。久而無述。懼有闕焉。肆命大臣。典領成書。爾等俱以儒英入館閣。佐太史氏。親見聖王之傳。顧不遑歟。晉陟京聯。以旌爾勞。以貽訓于億萬世。則爾與有無窮之聞。可。

除崇政殿說書告

淳熙元年正月十四日王淮行

朕蒐攬英雋。置諸冊府。如藝梓杞。待其成材。凡一時詞臣講官。鮮不繇此。有能翹然自拔於衆人之中。則

將試而用之。進以不次。爾性識敏悟。學業夙成。見於文詞。有秀傑邁往之氣。朕既爲爾綿繇典故。攝直翰墨之林。經幄需賢。肆以命爾。可謂士之榮遇者矣。昔魯秉周禮。敵人不敢加兵。禮之有益於國如此。据古以言。無爽朕聽。可。

除著作郎告 淳熙六年正月二十日陳駿行

爾作屬西府。精於編摩。攝直北扉。工於潤色。亟立要津。衆亦爲允。然猶儲之東觀。何哉。蓋夷玉不厭於韞藏。良材益務於培養。矧茲極所授訓言。隆興以來政事。實資閱博。纂成冊書。往奮筆焉。豈曰弗稱。可。

進日曆轉奉議郎告 淳熙六年四月八日李木行

王者世有史官。君舉必書。所以謹言行。昭法式也。爾充職蘭臺。典司著撰。傳信萬世。實藉三長。汗青告成。宜進官列。更勤繼錄。以對恩榮。可。

進會要轉朝奉郎告 淳熙六年八月十日李木行

勅朝散郎試祕書少監施師點等。朕自膺傳緒。常務策勵。以時繁年。廣記已藏於巖密。舉綱撮要。類分將備於討論。爾等學擅該通。才高述作。備竭勤勞之力。共成詮次之功。遂續前編。同標鉅典。宜被進官之寵。用旌載筆之良。祇服予恩。益恭汝職。可。

進三朝寶訓轉朝散郎告 淳熙七年五月施師點行

朕欽惟藝祖。肇造區夏。太宗眞宗。繼統揚業。其宏摹遠略。載諸簡編。以爲子孫億萬斯年之訓者。殆與典

誥相爲表裏。朕丕承厥緒。歷選名儒。進讀於退朝之暇。是憲是述。罔敢荒寧。逮茲終篇。可無褒賞。爾高文綺潤。奧學淵淳。進直北門。親結九重之眷。入陪西學。光膺再命之榮。屬恩典之遂行。肆文階之序進。其祇戒渙。益勵忠規。可。

除國子司業告

淳熙七年七月十五日鄭丙行

勅。朝奉大夫國子司業兼國史院編修官兼太子侍講何耕等。朕惟永平之際。園橋門以億萬計。正觀之盛。闢黌舍千二百區。人文之興。治道以立。茲用恢宏學校。建置師儒。庶幾禮義之行。可致肅雍之化。以爾耕。渾然道德。不見圭角。爾敦詩卓爾文辭。富有波瀾。秀出班行。表表愈偉。頗袖後進。于于而來。其竝列於成均。庸丕闡於儒教。化民成俗。必由學。式崇賢士之關。惇師考德。以爲官。益勸範模之美。可。

再除崇政殿說書告

淳熙七年七月二十三日施師點行

春秋王道之權衡也。朕所朝之餘。詳延鴻博。敷釋於前。蓋將究其指歸。以補治道之未至。與其選者。實難其人。爾才茂而識明。學深而文富。北扉視草。增潤於皇猷。東觀袖書。追芳於良史。是用陪露門之間燕。專麟筆之討論。推褒貶於一字之嚴。辨得失於三傳之異。毋嫌諄複。庶廣緝熙。緊爾嘗爲。奚俟多訓。可。

進讀正說轉朝請郎告

淳熙八年五月十三日木待問

朕永念定陵。貽孫謀於億世。肆臨講殿。敷正說於諸儒。爾思好深湛。辭尚體要。司成胄序。蔚爲雋造之宗。寓直複門。式擬坦明之制。進聯侍學。論本□□。茲□絕業之修。宜錫懋官之寵。侈而稽古。昭我右文。可。

除中書舍人告

淳熙八年九月二十四日奉旨行

朕澄出治之源。公馭臣之柄。遴求端士。冀諸禁密之聯。比飭溫言。責以論思之益。矧參華於內史。必試可於真材。具官崔敦詩。文企前修。器先遠識。荐游冊府。胸中儲未見之書。晉長膠庠。館下服于勤之業。經模久嘉於侍學。輪闌獨擅於摘詞。充爾所長。恢乎餘地。載惟西臺。命令之本。豈徒東里潤色之工。一賞或僭。則國維不張。羣枉未排。則官邪猶在。能盡言而無隱。斯庶政之惟醇。蔽自予衷。擢居是選。朕於知人則哲。追盛治於有虞。爾其遇事不回。繼祖風於祐甫。

致仕告

淳熙九年十二月十五日字文价行

持棗甘泉。方極清華之選。挂冠神武。忽騰休退之章。曾雅志之莫回。宜贊書之寵錫。具官崔敦詩。才猷敏瞻。問學淵源。入踐班聯。早膺譴擢。三館兩學。久陪英俊之遊。西掖北門。獨擅詞章之職。有貢獻納。逮爽節宜。正當強仕之年。欲致爲臣而去。肆稽彝典。寵陟文階。勉加調攝之功。益介康寧之福。

贈中大夫告

淳熙十二年二月十六日王信行

未老歸休。駭予聞聽。將終占奏。嗟爾淪亡。眷□□□。邇聯頒。愍章之殊渥。具官崔敦詩。文詞藻蔚。問學□澄。蚤陪英雋之游。徧歷清華之選。代言西掖。簡自朕知。攝直北門。創由卿始。方快雲霄之直上。忽驚蒲柳之易衰。緬懷朝夕。論思之誠。深悼春秋。電窅之事。用稽令典。峻陟文階。豈惟榮及於爾終。抑亦賞延于厥後。尙其英爽。服此寵光。可。

祭文

同朝侍從

維淳熙九年歲次壬寅五月丙午朔十五日甲申。敷文閣學士通議大夫提舉佑神觀韓彥直。太中大夫權吏部尚書兼同修國史鄭丙。太中大夫權兵部尚書兼侍讀兼同修國史兼權禮部尚書芮燁。降授朝請大夫權工部尚書兼知臨安府王佐。朝請大夫龍圖閣待制樞密都承旨蕭燧。朝請大夫權尚書吏部侍郎葛邲。朝散大夫權尚書戶部侍郎曾逮。朝散大夫權尚書刑部侍郎兼詳定一司勅令賈選。朝請大夫太府少卿兼權戶部侍郎燕世良。謹致祭于崔公侍講直院中書舍人靈筵。嗚呼。昌光輪困。間氣扶輿。萃于二妙。聯翩俊儒。鳳鵠接羽。同翥天衢。公又超詣。一日千里。玉璫瓊琚。厥辭愈偉。爰自木天。聲華特起。昭徹宸聽。華袞褒之。主父見晚。司馬同時。攝直代言。創見於斯。紫誥黃麻。俱自有體。公兼二長。文不停綴。盤詰聲牙。英莖粹美。垂紳正笏。密勿謀謨。豈惟翰墨。組麗之徒。人所跂望。李裴與俱。云胡半途。濫汜已極。人生萬事。孰可料測。閱日幾何。榮悴懸隔。嗚呼哀哉。天畀公厚。莫畀其全。文固卓立。位亦可言。所欲然者。不假之年。顏夭跖耆。畸偶定數。死生夜旦。當公理悟。弱妻穉子。可念荼苦。彥直等實同僚案。敢置交情。屬詞致奠。核旅酒馨。魂兮歸來。不昧平生。

給舍經筵

維淳熙九年歲次壬寅五月丙午朔十六日乙酉。朝請大夫試給事中兼太子詹事施師點。中大夫守中書舍人兼太子左庶子木待問。朝散大夫新除中書舍人兼侍講宇文价。朝奉大夫新除起居郎兼太子侍講詹儀之。奉議郎新除起居舍人兼侍講王藺。謹致祭于崔公侍講直院中書舍人靈筵。惟公天稟之閭明兮。又種學之敏強。涉經史之渺漫兮。窮百氏之濫觴。文辭蔚其芳腴兮。追前修以翱翔。蚤拾芥於賢科兮。聲浸徹乎帝旁。道山藏室俶發軔兮。儵進直乎玉堂。黃麻紫詔多出其手兮。仍勸講乎華光。后皇嘆其信娉兮。曰汝其持橐乎駕行。量西掖暮北門兮。覃思乎翰墨之場。駕駟馬於九達之夷路兮。夫孰測其騰驤。一疾忽其變遷兮。奄脩夜之不暘。嫠抱病而枕泣兮。穉呱呱而沾裳。聞者爲之隕涕兮。矧同寮之愛忘。嗟人世之夢幻兮。難控揣以爲常。有生終於必死兮。何有菌椿與彭殤。惟俯仰無愧怍兮。啓手足其奚傷。陳薄奠以寫哀兮。魂英明其來嘗。

同朝學官

維淳熙九年五月丙午朔十一日庚辰。朝請郎守國子司業沈揆。承事郎國子監丞黃唐。寄理宣教郎國子博士李祥。宣教郎太學博士勾昌泰。文林郎太學博士黃艾。文林郎太學博士羅點。秉義郎武學博士陳說。朝奉郎行國子監主簿喻良能。秉義郎武學論王公弼。從政郎行國子監錄方有開。迪功郎太學錄章頴。從事郎國子監書庫官戴履。謹以清酌庶羞之奠。祭于侍講直院中書舍人崔公之靈。惟萬生之紛綸。孰主張其榮悴。伊通塞之靡常。厥去來之莫避。或蘊蓄而不信。或堀奇而弗試。能嶸嶸以自表。蓋千萬

而一二公擢秀於淮服。蚤蜚聲於高第。雖隸萼之齊芳。固升沉之頓異。自時命之獨遭。躡清華於中祕。彼金鑾之三入。重成均之置貳。上紫微以秉筆。俾兼司於兩制。用翰墨以承恩。亦罕聞於近世。謂搏扶而未已。胡半塗而逢癘。昔伯氏之閔凶。銜餘哀而未艾。嗟遺息之甫非。藐諸孤而誰諉。夫既畀之利達兮。忽中債而何謂。豈命力不兩立兮。付成虧於一致。潔酒肴以在列兮。耿哀懷而莫寄。感情契之不能忘兮。聊寓誠於一詠。

在朝同年

維淳熙九年歲次壬寅五月丙午朔十二日辛巳。承議郎監行在左藏西庫陳公亮。朝散郎通判臨安軍府事王明發。承議郎行太府寺丞柳大雅。朝請郎守國子司業沈揆。從事郎主管尙書禮兵部架閣文字王三恕。朝奉郎太常博士宋若水。從政郎監行在草料場朱藻。朝奉郎尙書考功員外郎章森。承議郎守尙書左司員外郎王信。奉議郎直祕閣兩浙路轉運判官耿秉。朝散郎尙書刑部員外郎吳宗旦。奉議郎兩浙轉運司主管文字丁朝佐。儒林郎監行在省倉門周震來等。饒以清酌庶羞之奠。致祭于侍講直院中書舍人崔公之靈。惟公學以緝成。文由體工。名卿延譽。聲聞九重。發蹟冊府。攝承玉堂。朝無近比。公實濫觴。編摩著庭。經筵省戶。恩光燁煜。重印疊組。若時司成。領袖二學。臺萊蔚茂。繫其先覺。拜命云初。時則強仕。聞道吾前。云胡計齒。迺躋掖垣。迺正寓直。金華勸講。亦座重席。坦明之制。方駕常揚。誦說之偉。褚馬鴈行。停涵聿深。廣厚雄渾。有燁其華。益殖其根。紫樞黃閣。緩步徐行。豈其一疾。鎔采淪精。疇昔伯仲。聯擢

儒科來遊帝廷。袂屬肩摩。自伯之徂。淚睫未乾。復此淪落。行路辛酸。嗚呼哀哉。天恠靈奇。文能窮人。抽深抉密。鬼神所嘖。自古已然。夫復何言。猶有副墨。藏之名山。公亮等託契年籍。竝遊朝序。情好稠重。言言語語。自聞稔疾。接踵門墻。進莫我與。敢懷煥涼。卷衣雖復。何有何無。于以寄哀。惟蕭及壺。

陳司理

維淳熙九年歲次壬寅五月丙午朔十三日。迪功郎臨安府左司理參軍陳之芳。謹以清酌庶羞之奠。致祭于侍講直院中書舍人崔公之靈。惟公茂德。摺紳是矜。發策決科。棠棣聯登。官達烜赫。閭閻青蠅。帝眷有加。掌制西清。爲舍人樣。顧問談經。黑頭逝水。邦國殄驚。嗚呼痛哉。友于愛重。譽著鄉評。接翼翱翔。倏爾飄零。如賓偕老。黃鵠歌升。呱呱而泣。其何忍聽。却藥屏愛。一練青青。頌辭無愧。彈指生平。嗚呼痛哉。之芳濫巾司獄。三見周星。忝辱葭莩。獲拜典刑。門墻相望。與進情傾。吁嗟漏盡。九原莫興。敬致薄奠。涕洒銘旌。

陳教授

維淳熙九年歲次壬寅五月丙午朔十九日戊子。親未從政郎新温州州學教授陳紳。謹以清酌庶羞之奠。敬祭于侍講直院中書舍人崔公姨丈之靈。嗚呼。天地英靈。秀淑之氣。造化所慳。多取爲忌。難弟難兄。萃于公門。接翼儒科。粲然而文。公之辭章。尤爲卓犖。猛虎長蛇。赤手捕縛。渾然天成。不露圻塹。帝曰來歸。置之玉堂。視草代言。實惟汝長。罔俾常揚。專美有唐。夜半席前。論天下事。昌言讜辭。無所顧忌。如水投石。仰當帝意。鳳閣西清。極儒者榮。步武駸駸。補助疑丞。胡然半途。而嗇其齡。嗚呼哀哉。富貴無聞。又焉用久。

朝而聞道。夕死不朽。公之雅歌。藏在樂官。公之誥詔。百代不刊。愛君憂國。無負所學。易簀從容。何愧何作。嗚呼哀哉。紳之荷公。親愛是敦。分則友壻。義同弟昌。教我掖我。繫公之恩。吾喪吾室。公書來唁。如拯溺焚。開釋繯繯。公之喪兄。義篤友于。我慰以書。公其少紓。庚子之春。摻袂執別。尺書勞苦。間歲闊絕。方期來還。再侍笑言。嗟嗟訃音。忽墮目前。嗚呼。身世空華。俛仰今昔。孰云一朝。幽明長隔。有肴盈缶。有酒盈觴。慟哭公堂。魂兮不忘。

挽章

朝奉郎新除起居舍人兼國史院編修官兼權直學士院趙彥中

直上青霄早。秋翎插健雕。心源九雲夢。筆陣幾嫖姚。視草含英鳳。封章落貴貂。身前茂陵藁。及謁漢皇朝。

君爲鑑論
甫及奏御

仙院分宵直。書庭接翼翔。情忘海夫臭。語借令君香。君頃因夜對語及不肖姓名壯髮猶藏葆。生芻已奠觴。修文平日

事。地下亦爲郎。

贊皇李處全

雅望高簪履。昌言動冕旒。五花方判事。萬戶合封侯。未換黃金帶。俄成白玉樓。匆匆大槐國。起滅等浮沤。桂籍聯升望。舜裳香飄折檻馥。天光我心但媿兼葭倚。衆目爭觀鴻鴈鵠。策足華涂欣袞袞。致身台路失

堂堂併看雙壁埋黃壤。一慟風前淚數行。

朝奉大夫守宗正少卿兼太子侍講史彌大

在昔誇三喜。于今萃一門。周還陪帝學。終始代王言。晉擢傾人望。規陳悉治原。彼蒼無處問。才大合調元。憶昨登瀛日。相親意最深。耽書加我癖。體國見君心。遽就黃梁夢。空遺丹屐箴。堂堂那復有。衰涕泣霑襟。

寄理宜教郎國子監博士李祥

聲聞江淮滿。文章燕許期。華棣聯秀萼。椿老見芳枝。壁水風流盡。金鑾眷遇私。哀榮極閔飾。埋玉更成悲。宜教郎充詳定一司勅令所刪定官方有開

士有千齡遇。名傳百世榮。文章肇權直。淮海出儒英。紫禁煙花邃。黃麻黼黻明。方深丹屐眷。痛惜掩佳城。久託奎躔照。仍從璧水遊。冲襟粲星斗。高議炳陽秋。磊落觀材傑。凋零悼世浮。傳家真驥子。努力紹先猷。承議郎直徽猷閣權知平江軍府事耿秉

足躡脩門甫十年。惟餘篇翰富流傳。橫經趣得陳編外。草制雄誇落筆先。爭美冰銜塵不染。忍觀華□□隨遷。忠輸丹屐箴猶在。一鑑云亡共黯然。

朝散大夫樞密院檢詳諸房文字兼樞密副都承旨陳蒼舒

早結淵衷眷。英名擅四方。獻箴誠剴切。婁諫極忠良。勸講黃金殿。修辭白玉堂。簪紳散盛美。何事遽云亡。昔宰金淵日。獲從二陸游。同朝深自喜。投袂意相稠。伯氏方驚歿。公平遽若休。佳城知有日。老淚灑西州。

